

太上玄靈北斗延生妙經

開經讚

四寶台

北 斗 九 皇 位 冠 五 方
人 神 主 宰 煥 星 光
調 理 紀 和 綱 聖 德 難 量
賜 福 頌 無 疆
皈 命 北 斗 賜 福 大 星 君

禮三寶

願合宮眾弟子福壽綿長志心朝禮
清微玉京山妙無上帝大羅元始天尊
願合宮眾弟子福壽綿長志心朝禮
禹餘浮屠山妙有上帝玉宸靈寶天尊
願合宮眾弟子福壽綿長志心朝禮
大赤崑崙山妙變上帝混元道德天尊

淨心神咒

太上台星 應變無停 驅邪縛魅 保命護身
智慧明淨 心神安寧 三魂永久 魄無喪傾

淨口神咒

丹朱口神 吐穢除氛 舌神正倫 通命養神
羅千齒神 卻邪衛真 喉神虎賁 氣神引津
心神丹元 令我通真 思神鍊液 道炁長存

淨身神咒

靈寶天尊 安慰身形 弟子魂魄 五臟玄冥
青龍白虎 隊仗紛紜 朱雀玄武 侍衛我真

安土地神咒

元始安鎮 普告萬靈 嶽瀆真官 土地祇靈
左社右稷 不得妄驚 回向正道 內外澄清

各安方位 備守壇庭 太上有命 搜捕邪精
護法神王 保衛誦經 皈依大道 元亨利真

淨天地神咒

天地自然 穢氣分散 洞中玄虛 晃朗太元
八方威神 使我自然 靈寶符命 普吉九天
乾羅怛那 洞罡太玄 斬妖縛邪 殺鬼萬千
中山神咒 元始玉文 持誦一遍 卻鬼延年
按行五嶽 八海知聞 魔王束首 侍衛我軒
凶穢消散 道炁長存

金光神咒

天地玄宗 萬炁本根 廣修億劫 證吾神通
三界內外 惟道獨尊 頂有金光 覆映吾身
視之不見 聽之不聞 包羅天地 養育群生
受持萬遍 身有光明 三界侍衛 五帝伺迎
萬神朝禮 役使雷霆 鬼妖喪膽 精怪忘形

內有霹靂 雷神隱名 洞慧交徹 五炁騰騰

金光速現 覆護

真形
壇庭

祝香神咒

道由心學 心假香傳 香爇玉爐 心存帝前
真靈下盼 仙佩臨軒 眾等關告 逕達九天

太上老君說常清靜妙經

老君曰 大道無形 生育天地 大道無情 運行日月 大道無名 長養萬物 吾不知其名 強名曰道 夫道者 有清有濁 有動有靜 天清地濁 天動地靜 男清女濁 男動女靜 降本流末 而生萬物 清者濁之源 動者靜之基 人能常清靜 天地悉皆歸

夫人神好清 而心擾之 人心好靜 而慾牽之 常能遣其慾 而心自靜 澄其心 而神自清 自然六慾不生 三毒消滅 所以不能者 為心未澄 慾未遣也 能遣之者 內觀其心 心無其心 外觀其形 形無其形 遠觀其物 物無其物 三者既悟 惟見於空 觀空亦空 空無所空 所空既無 無無亦無 無無既無 湛然常寂 寂無所寂 慾豈能生 慾既不生 即是

清靜 真常應物 真常得性 常應常靜常清靜矣 如此清靜 漸入正道
既入正道 名為得道 雖名得道 實無所得 為化眾生 名為得道 能悟
之者 可傳聖道

太上老君曰 上士無爭 下士好爭 上德不德 下德執德 執著之者 不
明道德 眾生所以 不得真道者 為有妄心 既有妄心 即驚其神 既驚
其神 即著萬物 既著萬物 即生貪求 既是貪求 即是煩惱 煩惱妄想
憂苦身心 便遭濁辱 流蕩生死
常沈苦海 永失真道 真常之道 悟者自得 得悟道者 常清靜矣
皈命常清常靜大天尊

開經偈

仰啟中天聖 尊居北斗垣
宣威司造化 垂象制乾坤
廣設皈依路 大開解謝門
延齡與度厄 持誦各沾恩

太上玄靈北斗本命延生妙經

爾時太上老君 以永壽元年 正月七日 在太清境上 太極宮中 觀見眾生 億劫漂沉 周迴生死 或居人道 生在中華 或生夷狄之中 或生蠻戎之內 或富或貴 或賤或貧 暫假因緣 墮於地獄 為無定故 罪業牽纏 魂繫陰司 受苦滿足 人道將違 生居畜獸之中 或生禽蟲之屬 轉乖人道 難復人身 如此沉淪 不知自覺 為先世迷真之故 受此輪迴 乃以哀憫之心 分身教化 化身下降 至於蜀都 地神湧出 扶一玉局 而作高座 於是

老君昇玉局座 授與天師真人 北斗本命經訣 廣宣要法 普濟眾生 是時老君告天師曰 人身難得

中土難生 假使得生 正法難遇 多迷真道 多入邪宗 多種罪根 多肆巧詐 多恣淫殺 多好群情

多縱貪嗔 多沉地獄 多失人身 如此等緣 眾生不悟 不知正道 迷惑者多 我今哀見 此等眾生 故垂教法 為說良緣 令使知道 知身性命 皆憑道生 了悟此因 長生人道 種子不絕 世世為人 不生無道之鄉

不斷人之根本 更能心修正道 漸入仙宗 永離輪迴 超昇成道 我故
示汝妙法 令度天民 歸真知命 可以本命之日 修齋設醮啟祝
北斗 三官五帝 九府四司 薦福消災 奏章懇願虔誠獻禮 種種香花
時新五果 隨世威儀 清淨壇宇 法天象地 或於觀宇 或在家庭 隨力
建功請行法事 功德深重 不可具陳 念此

大聖北斗七元真君名號 當得罪業消除 災衰洗蕩 福壽資命 善果臻
身 凡有急難 可以焚香誦之 剋期安泰 於是說大聖北斗解厄應驗曰

大聖北斗七元君 能解三災厄

大聖北斗七元君 能解四煞厄

大聖北斗七元君 能解五行厄

大聖北斗七元君 能解六害厄

大聖北斗七元君 能解七傷厄

大聖北斗七元君 能解八難厄

大聖北斗七元君 能解九星厄

大聖北斗七元君 能解夫妻厄

大聖北斗七元君 能解水火厄

於是七元君 大聖善通靈

濟度諸厄難 超出苦眾生

若有急告者 持誦保安平

盡憑生百福 咸契於五行

三魂得安健 邪魅永消停

五方降真炁 萬福自來駢

長生超八難 皆由奉七星

生生身自在 世世保神清

善似光中影 應如谷裡聲

三元神共護 萬聖眼同明

無災亦無障 永保道心寧

老君曰北辰垂象 而眾星拱之 為造化之樞機 作人神之主宰 宣威三界
統御萬靈 判人間善惡之期 司陰府是非之目 五行共稟 七政同科
有迴死注生之功 有消災度厄之力 上至帝王 下及庶人 尊卑雖則殊

途命分俱無差別 凡夫在世 迷謬者多 不知身屬北斗 命由天府 有災有患 不知解謝之門 祈福祈生莫曉歸依之路 致使魂神被繫 禍患來纏或重病不痊 或邪妖剋害 連年困篤 累歲迍邐 塚訟微呼 先亡復連 或上天譴責 或下鬼訴誣 若有此危厄 如何救解 急須投告 北斗醮謝真君 及轉真經 認本命星君 方獲安泰 以致康榮 更有深妙 不可盡述 凡見

北斗真形 頂禮恭敬 咒曰

天靈節榮 願保長生 太玄之一

守其真形 五臟神君 各保安寧

急急如律令

聖母紫光天后

太極天皇大帝

北極紫微大帝 擎羊聖者 陀羅聖者

北斗第一天樞宮 陽明貪狼太星君

子生人屬之

北斗第二天璇宮 陰精巨門元星君

丑亥生人屬之

北斗第三天璣宮 真人祿存真星君

寅戌生人屬之

北斗第四天權宮 玄冥文曲紐星君

卯酉生人屬之

北斗第五天衡宮 丹元廉貞綱星君

辰申生人屬之

北斗第六闔陽宮 北極武曲紀星君

巳未生人屬之

北斗第七瑤光宮 天衝破軍關星君

午生人屬之

北斗洞明宮外輔星君

北斗隱光宮內弼星君

上台虛精開德星君

中台六淳司空星君

下台曲生司祿星君 三台生我來 三台養我來 三台護我來 如是真君
名號不可得聞 凡有見聞 能持念者皆道心深重 宿有善緣 得聞持誦
其功德力 莫可稱量 若正信男女 值此真文 智慧性圓 道心開發 出
群迷逕 入希夷門 歸奉真宗 達生榮界 於三元八節 本命生辰 北斗
下日 嚴置壇場 轉經齋醮 依儀行道 其福無邊 世世生生 不違真聖
不入邪見 持經之人 常持誦七元真君所屬尊號 善功圓滿 亦降吉祥
即說咒曰

北斗九宸 中天大神 上朝金闕

下覆崑崙 調理綱紀 統制乾坤

大魁貪狼 巨門祿存 文曲廉貞

武曲破軍 高上玉皇 紫微帝君

大周天界 細入微塵 何災不滅

何福不臻 元皇正炁 來合我身

天罡所指 晝夜常輪 俗居小人

好道求靈 願見尊儀 永保長生

三台虛精 六淳曲生 生我養我

護我身形 密咒

魁魍魎魍魎魍魎尊帝急急如律令

老君曰 凡人性命五體 悉屬本命星官之所主掌 本命神將 本宿星官 常垂蔭佑 主持人命 使保天年 凡俗無知 終身不悟 夫 本命真官

每歲六度降在人間 降日為本命限期 有南陵使者三千人 北斗真君

七千神將 本命真官 降駕眾真 悉來擁護 可以消災懺罪 請福延生

隨力章醮 福德增崇 其有本命 限期將至 自身不知 不設齋醮 不修

香火 為此輕生迷本 不貴人身 天司奪祿 減算除年 致多天喪 迷誤

之者 雖遇經訣 懷不信心 毀謗真文 如此之人 身謝之後 淪沒三途

漂沉六趣 永失人身 深可悲哀 自致斯苦 若本命之日 能修齋醮 善

達天司 一世於本命限期 開轉此經 廣陳供養 使三生常為男子身

富貴聰明 人中殊勝 其有生身果薄 雖生人中 貧窮下賤 縱知本命

無力修崇 能酌水獻花 冥心望北斗 稽首禮拜 念本命星君名號者 亦

不虛過本命限期 皆得延生注福 繫係人身 災厄蠲除 獲福無量 天師
歡喜踴躍 作禮讚嘆 難可得遇 無上法橋

老君重告天師曰 世人罪福善惡 皆屬天司 懺罪消災 莫越修奉 遇
本命生辰 告身中 元辰驛馬 削落三災九厄 保見令 眷屬安寧 凡有
上士 於本命生辰 持此真文者 外伏魔精 內安真性 功霑水陸 善及
存亡 悔過虔恭 漸登妙果 重立玄功 證虛無道 乃得聖智圓通 隱顯
莫測 出有入無 逍遙雲際 昇入金門 與聖合真 身超三界 永不輪轉
壽量無窮 快樂自在 凡有男女 於本命生辰 及諸齋日 清淨身心 焚
香持此真文 自認北斗本命所屬星君 隨心禱祝 善無不應 災罪消除
致感萬聖千真 俱來衛護 此文所在之處 千真敬禮 萬聖護持 魔鬼潛消
精靈伏匿 世有災殃 悉皆消滅 是名北斗本命延生經訣 乃修真之徑路
得道逍遙 皆因此經 證聖成真 皆因此經 出離生死 皆因此經 保護男
女 皆因此經 保命延年 皆得自在 永為身寶 福壽可稱 保而敬之 非人
勿示老君說經將畢 龍鶴天仙來迎 還於玉京 是時天師 受得妙法
而作是言 誓願流行 以傳善士 若有男女 受持讀誦 我當與十界仙

官所在擁護 於是再拜老君而說讚曰

家有北斗經 本命降真靈

家有北斗經 宅舍得安寧

家有北斗經 父母保長生

家有北斗經 諸厭化為塵

家有北斗經 萬邪自歸正

家有北斗經 營業得稱情

家有北斗經 闔門自康寧

家有北斗經 子孫保榮盛

家有北斗經 五路自通達

家有北斗經 眾惡永消滅

家有北斗經 六畜保興生

家有北斗經 疾病得安痊

家有北斗經 財物不虛耗

家有北斗經 橫事永不起

家有北斗經

長保亨利貞

老君曰 善哉善哉 汝可宣揚正教 普濟世人福利無邊 永沾勝善是
時天師 再拜老君 流傳此經於世 廣垂濟度 勿示非人 戒慎之焉

回向文

北斗七星 玉真仙靈 貪狼巨門 眾等長生
祿存文曲 眾等聰明 廉貞武曲 眾等安寧
破軍輔弼 眾等身形 常居吉慶 永處福齡
注上生籍 勾落死名 神清炁爽 洞達幽冥
禦邪攝鬼 群妖摧傾 學道修真 伏願遂成
七元覆護 飛昇紫庭 眾等下情無任感恩荷
聖激切懇禱之至
太上玄靈北斗延生妙經

完經讚

(長生曲)

中天大聖北斗玄冥

七元解厄善通靈
集福並延齡願見真形
頂禮獲康寧
皈命北斗賜福大星君

志心皈命禮

開明三景迴度五常為造化之樞機
作人神之主宰宣威三界統御
萬靈判人間善惡之期司陰府是非之目
能解一切罪攝伏諸魔精
大悲大願大聖大慈中天大聖
北斗九皇賜福星君
延生保命天尊

繳經讚

北斗經跪誦已週隆
回向四恩并三有合堂眾弟子

增福壽願將法水
洗愆尤
九皇宮聖眾唯願
垂納受
皈命北斗賜福大
星君

回壇

擎羊神女捧壇羅
西唱玄靈北斗歌
億萬閻閻不悉
仙風吹送祿緣波